

ETIENNE SALABERRY kalonjea

(1903-11-18-1981-VII-26)

Heleta Garrako seme zen Etienne Salaberry, joan beri zaigun *Euskaltzain Ohorezkoa*. Beloken eta Baionan eskolaturik. Baionan apeztu zen 1929.ean, eta Tolosan, filosofia ikasketak egin ondoan, Uztaritzeko apezgaitegira, 1931 an, irakasle etorri. 1958.etik hona, Baionako Villa-Pia ikastegian bete zuen gero bere irakasle ofizioa, adina iragan arte.

Bestalde Alemanian preso egon zen urte luzeetan, Etienne Salaberry-k aitortzen zuen, orduan zitzaiola bakarrik ohartu bere euskalduntasunari. Gerla ondoan beraz, Piarres Lafitte adiskideak eskaturik, hasi zen gogotik euskarazko artikulua idazten astero *Herria* astekari sortu berrian (1944). Geroztik *so egilearen* sinadura agertu da beti euskaldun kaseta horretan, aurtengo uztail arte. *Jakin* aldizkarian ere argitaratu zuen E. Salaberry-k filosofiako artikulua bat edo beste. Erdaraz ere, egia erran, bazuen artikulua frango agerturik, baina euskarara itzuliz geroz, euskaraz zitzaizkon bai *Eusko-Gogoa*, bai *Gure Herria*, bai *Gernika* aldizkarietako bere olerkietan bere bihotzeko sentipen minenak ateratzen.

Azkenik, prosaz idatzitako bi liburu aberatsetan eman digu E. Salaberry-k bere barne aberats eta kezkatiairen berri: *Ene Sinestea* (1979) eta *Benat Adixkidea, Agur!* (1981). Zorigaitzez idazlea bera joana zitzaigun azken idazti hau argitaratzean.

Arrasateko Biltzar Nagusian 1979.eko Abenduan, Euskaltzaindiak, Etienne Salaberry jaun kalonjea, Euskaltzain Ohorezko izendatua zuen.

P. Xarritton